

大清世宗憲皇帝實錄

大清世宗敬天昌運建中表正文武英明寬仁
信毅大孝至誠憲皇帝實錄卷之五十四

監修總裁官光祿大夫經筵講官太保議政大臣保和殿大學士兼兵部尚書總理兵部事三等伯加十五級臣鄂爾泰

總裁官光祿大夫經筵日講官起居注太保兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正五年丁未三月戊子朔諭直省督撫等

向來普雄烏蒙狝苗等。兇悍性成。又有漢姦
爲之煽惑。引誘。是以肆行不法。且其地在深
山密箐之間。最爲險阻。內地干犯重罪之人。
往往逃匿其中。一時難於捕緝。上年冬。岳鍾
琪。鄂爾泰。奉命勦撫兇苗。今據奏報。普雄烏
蒙狝苗。皆革面革心。輸誠嚮化。則內地犯法
之人。向來逃竄苗地者。此時必不能隱藏。又
將轉徙他處。爲苟活之計矣。爲此密諭爾等。
可乘此機會。設立賞格。各密飭所屬文武官

弁嚴行稽查。勿使匪類得以漏網。倘稽查不
慎。將來發覺之後。定將從前經過之處。不行
查出之地方官弁。及該管上司。從重治罪。○
吏部題。三等精奇尼哈番三泰故。銷去三次
恩詔所得拖沙喇哈番。餘三等阿思哈尼哈
番。以其親伯之孫關保承襲。從之。○改陝西
潼關衛爲潼關縣。設知縣一員。典史一員。復
設教諭訓導各一員。從川陝總督岳鍾琪請
也。○改湖南靖州天柱營參將隸貴州提督

管轄從雲貴總督鄂爾泰署湖廣總督福敏
等請也○庚寅諭內閣自古帝王致治誠民
莫不以重農爲先務書陳無逸先知稼穡之
艱難詩載豳風備叙田家之力作論語云百
姓足君孰與不足孟子云民事不可緩也蓋
國以民爲本民以食爲天農事者帝王所以
承天養人久安長治之本也我國家撫綏寰
宇

聖祖仁皇帝臨御六十餘年深仁厚澤休養生

息戶口日增生齒益繁而直省之內地不加
廣近年以來各處皆有收成其被水歟收者
不過州縣數處耳而米價遂覺漸貴閩廣之
間頗有不敷之慮望濟於隣省良由地土之
所產如舊而民間之食指愈多所入不足以
供所出是以米少而價昂此亦理勢之必然
者也夫米穀爲養命之寶人既賴之以生則
當加意愛惜而不可萌輕棄之心且資之者
衆尤當隨時撙節而不可縱口腹之欲每人

能省一勺。在我不覺其少。而積少成多。便可
多養數人。若人人如此。則所積豈不更多。所
養豈不更衆乎。養生家以食少爲要訣。固所
以頤神養和。亦所以節用惜福也。况脾主於
信。習慣便成自然。每見食少之人。其精神氣
體。未嘗不壯。此顯而可見者。至於各省地土。
其不可以種植五穀之處。則不妨種他物以
取利。其可以種植五穀之處。則當視之如寶。
勤加墾治。樹藝菽粟。安可舍本而逐末。棄膏

腴之沃壤而變爲果木之場廢饗飧之恒產
以倖圖贏餘之利乎。至於烟葉一種。於生人
日用。毫無裨益。而種植必擇肥饒善地。尤爲
妨農之甚者也。小民較量鎔銖。但顧目前而
不爲久遠之計。故當圖利之時。若令其舍多
取寡。棄重就輕。必非其情之所願。而地方官
遽繩之以法。則勢有所難行。轉滋紛擾。惟在
良有司。勤勤懇懇。諄切勸諭。俾小民豁然醒
悟。知稼穡爲身命之所關。非此不能生活。而

其他皆不足恃。則羣情踴躍。不待督課而皆盡力於南畝矣。朕聞江南。江西。湖廣。粵東數省。有一歲再熟之稻。風土如此。而仍至於乏食者。是地土之力有餘。而播植之功不足。豈非小民習於怠惰。而有司之化導者有未至耶。或者曰。米穀太多。則價賤而難於糶賣。昔人有穀賤傷農之說。諺語所謂熟荒者。此則不必過慮。假若小民勤於耕作。收穫豐盈。至於價賤而難於出糶。朕必多發官價以糶買。

之使重農務本之良民獲利而有餘貲也。朕
生平愛惜米穀。每食之時。雖顆粒不肯拋棄。
以朕玉食萬方。豈慮天庾之不給。而所以如
此撙節愛惜者。實出於天性自然之敬慎。竝
不由於勉強。且以米穀乃

上天所賜。以生養萬民者。朕爲天下生民主。惟
有敬謹寶重。仰冀天心默佑。雨暘時若。歲獲
有秋。俾小民家有蓋藏。人歌樂土。朕既爲億
萬生民計。不敢輕忽天貺。爾等紳衿百姓。獨

不自爲一身一家之計乎。朝夕生養之需。既受

上天之賜。若果加意愛惜。隨時撙節。則天必頻加錫賚。長享盈寧之福。若恣情縱欲。暴殄天物。則必上千天怒。不蒙眷賚。而水旱災祲之事。皆所不免。其理豈或爽哉。又聞江西。廣西地方。竟有以米穀飼養豚豕者。試思穀食之與肉食。孰重孰輕。孰緩孰急。而乃以

上天之所賜。小民終歲勤苦之所獲者。爲豢養

物類之用。豈不干天和而輕民命乎。朕所以
惓惓訓諭者。惟期天下之人。專務本業。以杜
浮靡。愛惜物力。以圖久遠。共體朕敬迓天庥
勤恤民隱之意。則爾等家室必益。至於豐饒
爾等子孫必永綿其福澤。思之思之。毋忽朕
言。著將此曉諭內外官民人等。並通行遠鄉
僻壤。咸使聞知。○又諭。朕以今年閏月。節氣
稍遲。二月天寒。故將會試日期。改至三月。但
目今天氣尚覺寒冷。若再改期。又恐舉子盤

費無多。難以久於旅食。今照舊於初八日入
場。著曉諭各舉子。俱許攜帶手爐。以溫筆硯。
皮衣及厚綿衣服。俱許穿進。但不得乘機懷
挾。以滋弊端。場內茶飯。著供給官加意預備。
朕另派大臣照看料理。令早晚給與薑湯。并
按名給發木炭。以資其用。○諭宗人府。廣寧
有罪。已革退王爵。其弟廣祿。人忠厚。著襲封
和碩裕親王。○先是貴州安籠總兵官蔡成
貴摺奏。廣西西隆州古障地方。土目王尚義。

等與貴州普安州捧鮓地方苗目阿九等。歷年互爭至染烏舍壩。黎魯礫等寨一案。因土目自相讎殺。俱係外結。例無考成。是以遲延未結。請敕下黔粵撫臣。另委大員審斷。并請嗣後審理兩省交界土苗案件。敕部議定限期。於邊方實有裨益。奉旨發與雲貴總督鄂爾泰議奏。至是雲貴總督鄂爾泰覆奏。苗民劫奪不已。地方官姑息因循。釀成此習。其故多由外結。臣經將分別流土考成。使各有專

責。不致案件遲延不結之處。其題在案。至於
黔粵之交。原有大江爲界。祇因犬牙相錯。以
致彼此相爭。今若劃江而理。江以南屬之粵。
江以北屬之黔。則界限井然。防守稽察。皆易
爲力。庶兩省之紛爭永絕矣。得旨。鄂爾泰既
稱黔粵兩省。當以大江分界。令韓良輔。李紱
前往雲南。與鄂爾泰面商苗地事宜。著將此
事一併會同定議。其土苗爭訟案件。例由外
結者。應如何定限之處。亦著議奏。○壬辰

上御太和殿視朝。諸王及文武陞轉各官謝恩。
○諭兵部。浙江綠旗兵丁懦弱。騎射生疎。營
伍不整。山陝兵丁。人材壯健。弓馬嫻熟者頗
多。將陝西各標營兵丁內。揀選一百名。移駐
浙江。分撥各標教習訓練。俾浙省兵丁。亦知
鼓勵。於行伍大有裨益。其撥往兵丁內。有人
材可用。騎射嫻熟。能約束教習者。即行拔補
千把總。總督岳鍾琪。現在四川。爾部行文陝
西提鎮。將伊等標下。及各營兵丁內。漢仗弓

馬俱好。情願攜帶家眷。移駐浙江者。甘肅固原二提標。各選二十名。肅州。涼州。寧夏。西寧。延綏。興漢。鎮標。各選十名。共一百名。如無家眷。隻身願往者。亦准其前往。倘兵丁內不能得願往之人。即行召募人材壯健。弓馬嫻熟。願往浙江者。以足其數。再兵丁自陝至浙。路途迢遠。搬移家口。費用繁多。兵丁難於措辦。係西安地方兵丁。交與西安巡撫。係甘肅地方兵丁。交與甘肅巡撫。酌量家口多少。給與